

ANG MAAYONG BALITA NI JESUS

**The Good News
Of Jesus**

Sinulat ni: Christy Akins Brawner

**Pagdisipulo nga Han-ay
Tagsunod sa Pag-ebanghelyo nga Han-ay**

Talaan sa mga Sulod

Unsaon pag-gamit sa “Ang Maayong Balita ni Jesus”	5
Leksyon 1: Ang Pagkatawo ni Jesus	7
Leksyon 2: Ang Pagbunyag Kang Jesus	12
Leksyon 3: Ang Kahibulongan ni Jesus	17
Leksyon 4: Ang Pagtudlo ni Jesus	23
Leksyon 5: Ang Pagbudhi Kang Jesus	27
Leksyon 6: Ang Pagpalansang ni Cristo	33
Leksyon 7: Ang Pagkabanhaw ni Jesus	41

**Unsaon Pag-gamit sa
“Ang Maayong Balita ni Jesus”
Sugilanon sa Biblia**

1. Sa pagsugod sa tigum ang matag-usa mag-ampo ug manghangyo sa Ginoo nga masabtan ang sugilanon.
2. Gamita ang sumusunod nga paagi sa pag-sangyaw sa sugilanon: Basaha sa makaduha gikan sa basahon ang matag-usa sa mga say-say ug hatagi ug katin’awan kung unsa ang imong na basa sa imo lamang kina-ugalingong pagkasulti. Sa paggamit niining paagiha maka hatag sa tawo ug higayon nga madungog sa makaduha ang sugilanon ug dali lang masabtan sa masayon nga paagi.
3. Kung aduna pay mga kopya mahimo tagaan pud ang uban nga wala pay kopya, mahimo pud nga ipasalmot sila pinaagi sa pag basa sa sugilanon.
4. Ang lider (Pangulo) kinahanglan maghatag ug mga pangutana human sa pagbasa sa sugilanon. Ang tumong sa mga pangutana mao ang pagbalik tuon ug koreksyonan ang ilang pagsabut sa sugilanon ug DILI para pagkagalam (elaborate) or lantugi (debate).
5. Basaha ang Espirituhanong kamatuuran. Tugoti ug taga-i ug kagawasan ang myembro sa paghisgut sa mga pangutana pinaagi sa Espirituhanong kamatuuran. Bantayi nga DILI sila mag bingkil or mag lantugi. Kay DILI makuha o masabtan ang Espirituhanong kamatuuran pinaagi sa panagbingkil ug paglantugi. Ang importante mao nga ilang masabtan ang kamatuuran ingon nga nagpadayag ang Ginoo pinaagi sa iyang pulong.

Pagkatapos sa Espirituhanong kamatuuran, maghatag ug panahon ang matag-usa aron sa panag-ambitay sa mga alampohan ug mga panginahanglan kauban ang mga myembro.

Mag-ampo nga paghingalan sa panginahanglan sa matag-usa sa myembro. Kung ang grupo mauswagon ug ang tawo nagdawat na sa Ginoo tugoti ang matag myembro mag ampo sa matag-usa.

Ang pagtapos sa leksiyon diha sa ika-pito, imong imbitahan sila sa pagdawat kang Jesus ingon nga ilang Ginoo. Kung ang matag-usa nag pakita nga sila interesado sa paghalad sa ilang kinabuhi kang Jesus ug sa panahon sa ikapito nga simana kinahanglan nga imo silang paambitan unsaon nila mahimong Ginoo si Hesus sa ilang kinabuhi ug tagaan nimo sila ug higayon sa paghimo niini.

Leksyon 1

“Ang pagkatawo ni Jesus”

Mateo 1-2

“Busa may 14 ka kaliwatan gikan kang Abraham hangtod ni David ug 14 ka kaliwatan gikan ni David hangtod sa panahon sa pagkabhag sa mga Israelita ngadto sa Babilonia ug laing 14 ka kaliwatan gikan sa pagkabhag hangtod nga natawo ang Mesiyas.” Mateo 1:17

Si Maria usa ka Judio nga babaye, nagsabak siya bisan walay nahitabo nga pagpakighilawas nga mga relasyon kay nagsabak siya pinaagi sa gahom sa Espiritu Santo. Si Jose nga iyang pamanhonon tawo nga matarong ug dili buot nga pakaulawan niya si Maria atubangan sa mga tawo, busa nagplano siya sa pagpakigbulag kaniya sa hilom. Samtang naghunahuna siya niini, mipakita kaniya ang usa ka anghel sa Ginoo pinaagi sa damgo ug miingon, “Jose, kaliwat ni David, ayaw kahadlok sa pagpangasawa kang Maria kay siya nagsabak pinaagi sa gahom sa Espiritu Santo. Manganak siyag batang lalaki ug nganli siyag Jesus kay luwason niya ang iyang katawhan gikan sa ilang kasal-anan.” Si Maria ang usa ka putli nga batan-ong babaye nga gisulti ni Propeta Isaias diha sa Daang Kasabotan sa iyang pagsulti, “Bulahan, ang usa ka putli nga batan-ong babaye magsabak unya manganak ug Batang Lalaki, ug nganlan siyag Immanuel”, nga sa ato pa “Ang Dios Ania Uban Kanato.”

Si Jose nagmata gikan sa iyang damgo ug gituman niya ang gisugo sa anghel. Iyang gipangasawa si Maria, apan wala niya hilabti hangtod nga siya nanganak. Ug ginganlan ni Jose ang bata ug Jesus, sumala sa gisugo, nga iyang nadawat gikan sa anghel. Natawo si Jesus sa lungsod sa Bethlehem, sa lalawigan sa Judea sa panahon nga naghari si Herodes.

Adunay mga tawo nga may kaalam Leksyon sa mga bituon nga nangabot sa Jerusalem gikan sa sidlakan. Sumala sa ilang pagtuon, nakita namo ang bituon nga nagpahibalo sa gisaad nga hari ug matawo sa Judea. Wala sila masayod sa ensakto kon asa nila makaplagnan ang Bata, miadto una sila ngadto sa palasyo ni Herodes, ang hari sa lalawigan sa Judea, ug nangutana kon asa nila makaplagnan ang bata nga natawo nga maoy mahimong hari sa mga Judio.

Sa pagkahibalo ni Hari Herodes niini, wala siya mahimutang ingon man ang tibuok Jerusalem. Gitigom niya ang kadagkoan sa mga pari ug ang mga magtutudlo sa Balaod ug gipangutana niya sila, “Asa man matawo ang Mesiyas?” Sila mitubag, “Sa lungsod sa Bethlehem, sa Judea. Mao kini ang giingon sa Dios nga gisulat sa propeta: ‘Ikaw, Bethlehem, sa yuta sa Juda, dili ka labing ubos sa mga dagkong lungsod sa juda; kaymaggikan kanimo ang usa ka pangulo nga maoy magmando sa akong katawhan, ang Israel.’

Busa gipatawag ni Herodes sa hilom ang mga maalamong bisita nga gikan sa sidlakan. Iyang nasayran gikan kanila ang untop nga takna sa pagsubang sa bituon. Unya gipaadto niya sila sa Bethlehem nga nag-ingon, Lakaw kamo ug pangitaa pag-ayo ang bata ug kon makaplagaan na ninyo siya, pahibaloa ako aron moadto ug mosimba usab kaniya.” Human nila paminawa ang hari, nanglakaw sila. Sa didto na sila sa dalan, nakita nila pag-usab ang bituon! Ug nag-una kini kanila hangtod nga miabot kini ug mihunong sa tungod gayod sa nahimutangan sa bata. Unya misulod sila sa balay ug nakita nila ang bata uban sa iyang inahan nga si Maria. Nangluhod sila ug misimba sa bata. Unya giablihan nila ang ilang mga gasa ug mihalad sila kaniyang bulawan, insenso ug mira. Pinaagi sa damgo gipahimatngonan sila sa Dios sa dili pagbalik ngadto kang Herodes busa namauli sila agi sa laing dalan.

Sa diha nga nanglakaw na ang mga maalamong bisita, usa ka anghel sa Ginoo ang mipakita kang Jose pinaagi sa damgo nga nag-ingon, “Bangon, dad-a ang bata ug ang iyang inahan ug pangagiw kamo ngadto sa Ehipto ug pabilin didto hangtod nga papaulion ko kamo kay ang bata pangitaon ni Herodes aron patyon.” Busa mibangon si Jose, gidala niya ang bata ug ang inahan ugmi-kagiw sila niadtong gabhiona padulong sa Ehipto. Nagpabilin sila didto hangtod nga namatay si Herodes. Nahitabo kini aron matuman ang giingon sa Ginoo pinaagi sa propeta, “Gitawag ko ang akong Anak gikan sa Ehipto.”

Sa pagkamatngon ni Herodes nga nalingla siya sa mga bisita, hilabihan gayod niyang sukoa. Unya misugo siya nga pamatyon ang tanang bata nga lalaki nga nagpanuigon gikan sa duha ka tuig ug ubos nga didto sa Bethlehem ug sa mga dapit nga kasikbit. Kini pinasikad sa iyang pangagpas nga maoy gidugayon sukad sa pagsubang sa bituon sumala sa mga bisita. Sa maong hitabo natuman gayod ang giingon sa Dios pinaai kang proteta Jeremias: “May tingog nga nabati didto sa Rama, usa ka mapait nga

pagminatay ug pagbangotan. Naghilak si Raquel tungod sa iyang mga anak ug walay makahupay kaniya kay patay na man sila.”

Sa patay na si Herodes, usa ka anghel sa Ginoo mipakita kang Jose didto sa Ehipto pinaagi sa damgo, “Bangon! Dad-a ang bata ug ang iyang inahan ug balik ngadto sa yuta sa Israel kay patay na ang nagtinguha pagpatay sa bata,” matod sa anghel. Busa mibangson si Jose ug gidala niya ang bata ug ang inahan ug namauli sila sa yuta sa Israel. Apan sa pagkadungog niya ang si Arquelaos na ang naghari sa Judea puli kang Herodes nga iyang amahan, nahadlok si Jose sa pagpuyo didto. Unya gipahimangnoan na usab siya sa Ginoo pinaagi sa damgo busa miadto siya sa lalawigan sa Galilea ug minpuyo sa usa ka lungsod nga ginganlag Nazareth. Nahitabo kini aron matuman ang giingon sa mga propeta, “Siya pagailhong taga-Nazaret.”

Pinulong nga mga Pangutana

1. Kinsa si Maria?
2. Hain nagpakita ang anghel ug isulti unsa ang pangalan sa bata?
3. Ngano ang mga Maalamanon (3 ka mago) nag adto sa Judea?
4. Nganong gusto ni Herodes pangitaon si Jesus?
5. Gi-unsa sa pag-pamauli sa mga tulo ka Maalamanon (3 ka mago) sa ilang balay sa laing dalan ug wala pagbalik ngadto kang Herodes?
6. Gi-unsa ni Herodes sa pagsulay sa pagpatay ang gisaad nga Hari sa mga Judio?
7. Gi-unsa ni Jose sa pagkabalo nga kinahanglan sila molakaw sa ilang lungsod ug mag-adto sa Ehipto?
8. Gi-unsa ni Jose sa pagkabalo nga kanus-a luwas sa pagbalik?
9. Nganong gidala ni Jose ang iyang pamilya sa katapad na lungsod sa Galilea nga pwede man sa Judea?
10. Unsay pangalan sa lungsod sa diin si Jesus nag tubo?

Leksyon 1

Espirituhanong Kamatuoran

Mateo 1-2

1. Ang Ginoo matinumanon ug ihatag niya ang saad. Gikan sa pagbuhat sa unang lalaki ug babae, ang Ginoo nag saad nga magpadala ug manluluwas sa kalibutan. Daghang tuig nangagi, gibalik-balik sa pag pasabot, naghatag ug mga detalye nga moabot ang Manluluwas. Si Jesus niabot sa takna na panahon nga sa diin gi-tagna sa kasulatan. Naga pahinumdom kuni kanato pina-agi sa sugilanon, gitagna ug natuman pina-agi sa pagkatawo ni Jesus.

* Ang Ginoo matinumanon sa bisan unsang paagi. Sa Biblia daghang mga butang nga gisaad sa Ginoo sa diin importante, Leksyon sa Iyang plano sa katawhan. Iya kining pagatumanon nga saad. Kinahanglan sa matag-usa nga magbasa sa kasulatan kay diha makita ang gi-saad sa Ginoo sa atong kinabuhi.
2. Ang Biblia pulong sa Ginoo ug kini matuod. Ang Ginoo nagpasidaan na sa Propeta ug gihatag ang maayong detalye mahitungod sa pagkatawo ug sa kinabuhi ni Jesu Cristo. Ang nahitabo matuod ug nahitabo sa hustong takna.
3. Ang Ginoo ang nag mando sa tanang butang. Mahimo niya ang tanang butang pina-agi sa kahibulungan butang. Makita diha ang mga kahibulungang butang sa sugilanon.
4. Mahimo sa Ginoo ang tanan ug mahimo niya na makig sulti sa tawo. Ang uban nagatuo nga ang Ginoo nagbuhat sa kalibutan pero wala siya naga tan-aw kung unsang nahitabo sa kalibutan. Sa unsang paagi nga nakigsulti ang Ginoo sa mga tawo sa kining sugilanon. Ang Ginoo nagapadayon sa pakigsulti kanato. Atong mahibaw-an pina-agi sa pagtuon nga unsaon nato maka-baton ug tinuod na relasyon diha sa Ginoo.
5. Nakahibalo ang Ginoo sa mga butang na mahitabo. Pero usahay, sa iyang pagkagamhanang kaalam, iyang gitugot ang makalilisang butang na mahitabo. Si Herodes gusto niya i-papatay ang gisaad na Hari kay nahadlok siya. Nahibalo pag-ayo ang Ginoo sa dautang kasingkasing ni Herodes. Nahibalo na ang Ginoo nga pamatyon ni Herodes ang gatos na mga bata.

Kay ang hinungdan sa iyang pag-kamasupilon ug ang pagbatok sa sulod sa iyang kasing kasing nga ngil-ad. Karon, anaa usahay ang ngil-ad na batasan kay tungod sa pag-kamasupilon ug pagbatok sa kinabuhi. Kabalo ka ba nga nganong ang tawo napasakitan kay tungod sa batasan nga ngil-ad sa iyang isigkatawo?

6. Ang tawo dili makalampos makadaug batok sa Ginoo. Si Herodes wala naglampos sa pagpatay sa gisaad nga Hari. Ang butang nga nahimo niya hinuon mao ang mangilngig nga panghitabo nga mao pagkadaut sa kinabuhi sa mga tawo. Karong panahona kita mga tawo naga sulay ug pag-batok sa balaod ug sa plano sa Ginoo. Kining pakigbatok nagdala hinuon sa tawo sa kagubot ug pagdaut sa maayong relasyon sa mga tawo. Nahuna-hunaan ba nimo kanunay ang imong kaugalingong kinabuhi sa diin ang imong mali nagdala ug kagubot sa imong kinabuhi? Kanunay ba nimo mahuna-huan sa diin ikaw nakasinati ug kasakit kay tungod sa pag-kamasupilon sa usa ka tawo?
7. Ang Pari ug ang relihiyoso na magtatambag nasayod sa kasulatan mahitungod sa gisaad nga Hari, Apan wala sila nilakaw ug nakigkita kang Jesus. Imposible kaayo sa mga relehiyoso nga kabalo kaayo sila sa kasulatan, apan wala kaayo sila kaila kang Jesus.
8. Si Jesus mao “Ang Dios ania uban kanato”, o “Immanuel”. Ang anghel nakigsulti kay Jose, nga mabasa sa kasulatan nga gisu-lat ni Propeta Isaiah. Ang mga tawo nagsulti nga si Jesus usa ka Propeta, ug ang uban nagsulti nga si Jesus usa ka anghel ug matuod na tawo. Pero ang Biblia nagpamatuod sa atoa nga Siya “Immanuel”.

Sa sunod nga ika-unom na simana, atoang paga-tukion nga kinsa si Jesus Cristo, ug unsa ang MAAYONG BALITA nga iyang gidala.

Leksyon 2
“Ang Pagbunyag Kang Jesus”
Mateo 3-5

“Hinulsoli ug biyai ang inyong mga sala kay hapit na maghari ang Dios.” Mateo 3:2

Balik Pagtuon

1. Ang pangalan sa inahan ni Jesus _____ .
2. Kahibulungang pagkatawo ni Jesus nga siya natawo sa _____
3. Ang daang kasulatan naghigut sa pagkatawo ni Cristo, usa na niana nga siya pagatawagong Immanuel, Buot pasabot “_____.”
4. Si Herodes usa ka _____ sa Judea nga nagsulay sa pagpatay kay Jesus. _____ niya ang mga bata sa sulod sa lungdod sa Betlehem.
5. Ang Maalamanon (3 ka mago) naglakaw aron sa pagpangita kang Jesus pinaagi sapagsunod sa _____. Ang Maalamanon (3 ka mago) namauli sila agi salaing dalan kay gipahimatngonan sila sa Dios sa dili _____ kay si Herodes gusto niya _____ si Jesus.
6. Si Jose nagkagiw kauban ang iyang pamilya sa kagabhion padulong sa Ehipto ug magpabilin didto kay ang _____ pangitaon ni Herodes aron patyon.
7. Kahibalo si Jose nga luwas ang pagbalik sa Israel pinaagi sa _____. Apan wala siya nibalik sa lungsod sa Betlehem.
8. Sa pagkahuman Niya pinaagi sa kasaysayan, Hangtud karon Ang Dios nagpadayon sa pagtuman sa iyang _____.
9. Ang Dios nahibalo unsa ang atong _____ bisan adunay pagakadautan sa atong kasing-kasing.
10. Imposible kaayo sa mga relehiyoso nga mga tawo nga nahibalo pagkaayo sila sa kasulatan, apan wala kaayo sila kaila kang _____.

Adunay pulong nga gimantala sa usa ka tawo nga sa diin makaplagn siya didto sa kamingawan sa Judea. Ang bisti niya hinimo gikan sa balahibo sa kamelyo, panit ang iyang bakos nagkinabuhi siya ug iyang pagkaon dulon ug dugos. Ang iyang ngalan mao si Juan Bautista.

Daghan sa katawhan sa tanang lugar nga nagpalibot sa Suba sa Jordan miadto sa kamingawan aron nga maminaw sa iyang mga pulong. Unya human maminaw sa iyang gipangsulti, daghan ang mabunyagi sa Suba sa Jordan nga naghinulsol sa ilang mga sala. Pipila sa mga relihiyosong mga pangulo, nga gitawag ug mga Saduseo ug mga Pariseo, miadto usab aron motana-aw sa mga panghitabo. Sa dihang nakita sila ni Juan nga Magbubunyag, gitawag niya kining mga "Kaliwat sa Bitin," (anak sa mga bitin) nga nagsulti nga sila wala mahadlok sa Ginoo tungod ilang hunahuna sa ilang mga kaugalingon nga mga relihiyoso ug anaa na sila sa maayong kahimtang nga dili na nila kinahanglan ang paghinulsol sa ilang mga sala.

Samtang si Juan nagwali, si Jesus miadto ug naghangyo kang Juan nga Siya magbunyag Kaniya. Si Juan mibalibad tungod iyang hunahuna nga dili siya angay nga magbunyag kang Jesus. Apan si Jesus mipugos, ug silang duha miadto sa tubig sa Suba sa Jordan. Sa dihang si Jesus mikawas gikan sa tubig, ang Espiritu Santo mipaubos daw salampati gikan sa langit gikan Kaniya. Usab, makusog nga tingog ang nag-gikan sa langit nga nag-ingon, "Kini mao ang Akong hinigugmang Anak, nga nakalipay Kanako pag-ayo."

Human niana ang espiritu Santo nagkuha kang Jesus sa kamingawan aron nga tintalon ni Satanas. Siya nagpuasa Siya sa pagkaon ug sa tubig sulod sa kwarantna ka gabii, ug human sa kwarantna ka gabii Siya gigutom ug pag-ayo. Kini ang panahon sa nga miadto si Satanas kang Jesus aron sa pagtintal Kaniya.

Ang Biblia nag-ingon naghigot sa tulo ka pagkatintal ni Jesus didto sa kamingawan. Sa iyang una nga pagkatintal, si Satanas nagsulay kang Jesus aron sa pagbuhat sa mga bato nga mahimong pan, nga mag-angkon nga Siya Ginoo. Si Jesus mitubag kaniya gamit ang sinulat nga Pulong sa Ginoo. Makaduha nga higayon, si Satanas nagdala Kaniya didto sa atop sa Templo ug nangutana Kaniya kon mahimo bang moambak Siya nga magpamatuod nga Siya Ginoo. Sa kataposan, si Satanas nagdala kang Jesus sa bungotd ug miingon, "Kining tanang butang ihatag

nako Kanimo kon ikaw magayukbo ug magdayeg kanako.” si Jesus mitubag, ” Ikaw magsimba sa Ginoo nga imong Dios, ug Siya lamang ang imong alagaran.” Tungod niani si Satanas mibiya Kaniya, ug ang mga anghel miabot ug gialagaran Siya.

Human pagbalik sa kamingawan, si Jesus nakadungog mahitungod kang Juan nga Magbubunyag nga gikulong. Ug unya si Jesus dayon miadto sa Galilea, bukid sa Judea, pagbiya sa Iyang lugar nga natawhan, ang Nazaret, ug pagbalhin ngadto sa Capernaum. Kini aron matuman ang gisulti sa propeta nga Isais, “ Ang yuta sa Sebulon ug yuta sa Naftali, agi sa sapa, unahan sa Jordan, pagano sa mga taga-Galilea: ang katawhan nga molingkod diha sa kangitngit makakita sa kahayag, ug ibabaw sa mga naglingkod sa anino sa kamatayon nga sa kahayag nagbanagbanag

Ang Biblia nagsulti kanato nga gikan sa siyudad sa Jerusalem si Jesus nagsugod ug lihok sa mga katawhan. Ang mensahe mao kini, ”Paghinulsol, kay ang ginharian sa langit anaa na.”

Pinulong nga mga Pangutana

1. Ihulagway ang gitawag nga si Juan Bautista?
2. Unsa ang mensahe ni Juan Bautista?
3. Unsa ang ginahimo ni Juan Bautista sa mga tawo nga nagahinulsol sa ilang nga kasal-anan?
4. Nganong dili niya gusto bautismohan si Jesus?
5. Gi-unsa sa pagbautismo si Jesus?
6. Unsay nahitabo sa pag pagkawas ni Jesus gikan sa tubig?
7. Nganong miadto si Jesus sa deserto?
8. Unsa ang gihimo ni Jesus sa sulod sa 40 ka adlaw ug 40 ka gabii?
9. Unsa ang usa nga gihimo ni satanas na pagtintal?
10. Pagkatapos sa pagtintal, kinsa ang miduol aron sa pag serbisyo kay Jesus?
11. Hain milakaw si Jesus human nahibaloan niya nga si Juan Bautista na bilanggo?
12. Unsa ang mensahe ni Jesus, Kinsa ang nagmantala sa kining mensahe?

Leksyon 2

Espirituhanong Kamatuoran

Mateo 3-4

1. Ang mensahe ni Juan Bautista ug kay Jesus managsamara. “Hinulsoli ug biyai ang inyong mga sala kay hapit na maghari ang Dios .”

- ◆ Ang pag hinulsol mao ang pagtalikud sa sala sa inyong kinabuhi. Buot pasabot itugyan ang tanan ug ang magmando sa imong kinabuhi mao si Jesus.
- ◆ Ang sala mao ang masupilon sa Ginoo ug sa iyang balaod.

Ang paghinulsol lisud ba pagahimuon alang sa tawo? Unsay buot pasabot niining pulonga para sa imo?

Hisgoti kini nga panghuna-huna diha sa inyong grupo; taga-i ang matag-usa ug higayon nga masulti ang ilang panan’awon.

2. Sa panghuna-huna sa mga pangulo nga relehiyoso dili na kinahanglan sa ila sa paghinulsol sa ilang sala kay tungod sa relihiyon. Kay sa ilang panghuna huna matuod na sila ug maayo. Si Juan gitawag niya kining mga tawhana nga anak sa bitin. Aduna bay usa sa kalibutan nga relihiyon nga husto ug matuod sa diin dili na kinahanglan ug paghinulsol sa ilang kasal-anan?

***Ang Biblia nagsulti Roma 3:23 “Nakasala ang tanan ug nahilayo sa himaya Dios.”**

Aduna bay usa diri sa kalibutan nga matarong ang iyang kinabuhi? Adunay bay usa sa diin nagatuman sa balaod sa Dios? Ang Biblia nagpamatuod ‘Wala’ Nag-uyon ka ba sa gisulti sa biblia nga kita nakasala diha sa atoang kinabuhi? **Usab, importante kaayo sa matag-usa nga makahatag ug higayon sa pagtubag sa Pulong sa Dios sa nahisgutan. Ingon nga Lider, (Pangulo) ayaw pagsupak or tugoti ang matag-usa nga mohatag sa ilang panghuna-huna, kay maayo man tugotan sila sa paghatag sa ilang kaugalingong pangisip.*

3. Si Jesus gibautismohan, Apan ang Dios matarung ug matuod.

Kini matarunganon nga nagpagsabaot kanato nga ang pag-bautismo DILI ingon nga relihiyoso nga tulumanon ug dili makawala sa sala sa kinabuhi sa tawo. Kung ang katuyoan sa pagbautismo mao ang paghinlo sa sala sa tawo, wala na unta magpabautismo si Jesus, kay Siya man ang Dios nga walay sala.

4. Si Jesus mikawas gikan sa tubig ug Ang Balaang Espiritu nagpaubos sa iya nga daw salampati ug mitugdon Kaniya, ug unya ang Amahang Dios nagsulti gikan sa langit, "Kini mao ang pinangga kong Anak nga nakalipay kanako pag-ayo." diri nakita nato ang tulo ka persona mao ang Trinity. Kinsa sila?

Dios Amahan, Dios Anak ug Dios Espiritu.

5. Si Jesus gidala sa deserto ug gitintal ni satanas. Si satanas tinuod. Siya mao ang espiritu sa kalibutan; kauban sa mga espiritu nga nagasunod sa iya nga gitawag ug demonyo, kini nga mga dautang espirituha makaguba sa atong kinabuhi ug dad-on ta sa pagsupak sa Dios. Bisan si Jesus gitintal, si satanas makatintal usab kanato. Pero ang Biblia nagtudlo kanato, dili pareha ni Jesus, gitintal pina-agi
6. Si Propeta Isaiah nag tagna nga si Jesus magpuyo ug siya ang mahimong suga sa mga katawhan nga naa sa kangitngit.

Ang tanan nato, kung wala si Cristo, naa sa kangitngit, seguro ikaw or imong hinigugma naa sa pagkinabuhi sa kangitngit. Ang uban makahatag sa ila ug kalipay mao ang droga, ang uban kahilayan, ug ang uban biktima sa panglugos. Ang bersikulo nagsulti kanato nga si Jesus mao ang suga para sa mga tawo nga anaa sa kangitngit, ug makahatag siya ug kagawasan sa mga tawo nga naay kagubot sa ilang kinabuhi.

*Sa pag-ampo nato matag-adlaw, himuon nato sa pag-ampo sa atong mga hinigugma nga nagpuyo sa kamatayon. Nga makaplagan nila ang suga ug kagawasan diha kay Jesus Crist.

Leksyon 3
“Ang Kahibulungan ni Jesus”
Mateo 4-9

“Kuyog kamo kanako ug tudloan ko kamo sa pagpanagat ug mga tawo.” – Mateo 4:19

Balik Pagtuon

1. Kinsa nag sulti kay Jose mahitungod sa pag-abot ni Jesus, ug kinsa nagsulti nga Iyang pangalan mao ang “Immanuel” kini nagatudlo kanato nga si Jesus _____.
2. Kinsa ang gusto mosulay ug pagpatay sa gamayng bata nga si Jesus? Ngano? Si Jesus ningkagiw kay tungod miadto sila sa _____.
3. Kinsa nagbautismo or nagbunyag kang Jesus? Gibautismohan or gibunyagan man si Jesus, isulti kanamo nga ang tumong sa pagbautismo dili mao ang paghinlo sa _____ sa atong kinabuhi.
4. Sa dihang si Jesus mikawas gikan sa tubig, unya adunay salampati nagpaubos, ug may tingog nagsulti gikan sa langit? Kinsa ang salampati ug kinsa ang tingog gikan sa langit?
5. Bisan dili na kinahanglan maghinulsol ang mga pariseo sa ilang mga sala kay tungod sa ilang relihiyon. Imposible / Mahimo ba nga husto o igo na ang pagkarelihiyoso para mawala ang mga kasal-anan?
6. Unsay buot pasabot sa pulong na “hinulsol”?
7. Unsa ang sala?
8. Kinsa ang nagtintal kay Jesus didto sa kamingawan?
9. Asa nag adto si Jesus pagkahuman nagbiya sa kamingawan?

Samtang Siya nagpadulong sa dagat sa Galilia, nahinagbuan ni Jesus ang duha ka mananagat. Gitawag Niya sila ug miingon, “Sunod kamo kanako ug himuon ko kamo nga mga mananagat sa katawhan”. Dihadiha dayon ilang gibiyaan ang ilang mga pukot ug msunod Kaniya. Sa mao nga adlaw, gitawag ni Jesus ang una Niyang upat ka mga disipulo nga mao sila si Pedro, Andreo, Santiago ug Juan. Silang tanan mga mananagat.

Si Jesus nag-adto sa tanang probinsiya sa Galilea sa mga sinagoga aron sa pagtulod, pagwali mahitungod sa pulong sa gingharian, Iya usab nga giayo ang tanang klase nga mga sakit sa mga tawo. Dakong panon sa katawhan ang nagasunod Kaniya.

Adunay usa ka sanlahon nga miduol kang Jesus ug nag-simba Kaniya. Gitawag niya si Jesus ug miingon, “Ginoo kun buot Mo, mamahimo Mo akong limpyuhan”. Ug si Jesus miresponde, “Buot ko, mahinlo ka”. Ug dihadiha dayon ang sanglahon nahinlo.

Usa ka kapitan sa mga sundalo miduol kang Jesus. Miduol siya kang Jesus aron nga pangayon kang Jesus ang pag-ayo sa iyang sulugoon nga naparalisa ug nag-antus, siya mituo sa gahum ni Jesus nga makayo sa iyang sulugoon. Si Jesus misulti kaniya nga dunay daghang tawo naggikan sa nagkalain-laing mga nasyonalidad nga duyog nga nagapangaon diha sa gingharian sa kalangitan, ug ang sulugoon naayo nianang orasa.

Sa lain nga parte sa dagat, adunay duha ka mga tawo nga nakabaton ug dautang ispiritu. Kusgan ug masuk-anon kining mga tawhana nga walay makagunit kanila o makalakaw sa dapit duol kanila. Sila nagpuyo duol sa mga lubnganan.

Sa dihang makita nila si Jesus, ang mga dautang ispiritu magsiyagit, “Unsa man ang among gibuhay kanimo, Jesus, Ikaw nga anak sa Diyos?, miadto Ka ba dinhi aron kami sakiton una ang muabot ang takdang panahon?”.

Ang mga dautang ispiritu nagpakilooy kang Jesus, “Kun itug-way mo kami, tuguti kami nga muadto ngadto sa mga baboy”. Ug si Jesus miingon kanila, “Panghawa kamo”. Dihadiha dayon ang mga dautang isipiritu nanggawas gkan sa duha ka tawo ug misulod ngadto sa mga baboy. Ug ang mga baboy gisudlan ug mga dautang ispiritu. Sila midagan ngadto sa pangpang ug nahulog ngadto sa kadagatan. Ug ang tanang mga baboy nangalunod.

Ang mga tag-iya sa baboy midagan ug nagsulti sa tanang mga katawhan sa ilang siyudad sa gibuhad ni Jesus, apil ang nahitabo sa duha ka mga tawo nga nasudlan ug dautang ispiritu. Ang mga katawhan sa maong dapit nanggawas aron sultihan si Jesus sa pagbiya sa maong dapit.

Mibiya si Jesus pinaagi sa bangka, ug mibalik sa Iyang kaugalingon dapit. Sa dili madugay, nahinagbu Niya ang usa ka tawo nga ginganlan ug Mateo. Si Mateo usa ka empleyado sa gobyerno isip usa ka kolektor ug buhis. Si Jesus miingon kaniya, "Sunod Kanako". Dayong mitindog si mateo ug misunod kang Jesus.

Si Jesus uban ang Iyang mga sumusunod, miduyog ug panihapon nianang gabhiona sa mga kolektor ug buhis ug uban pang mga tawo nga adunay dili maayong reputasyon sa maong lungsod. Sa dihang nakita kini sa mga lidars a relihiyon, ang gma Pariseo nangutana sa mga disipulo ni Jesus, "Nganong nakigkaon man ang inyong Magtutudlo sa mga kolektor ug buhis ug mga makasasala?".

Sa dihang nadungog ni Jesus ang ilang mga komento, Siya mitubag sa mga Pariseo, "Kadtong mga maayo wala nagkinahanglan ug mananambal, apan kadtong mga masakiton. Apan paminawa ug tun-i ang akhulugan niini: "Ako nagtinguha ug kalooy ug dili ang mga sakriisyo". Kay wala ako mianhi aron sa pagtawag sa mga matarong, apan sa mga makasasala aron sa paghinulsol".

Pinulong nga mga Pangutana

1. Unsa ang katungdanan sa unang disipulo ni Jesus?
2. Unsa ilang gihimo sa pag-ingon ni Jesus nga sunod kamo Kanako ?
3. Milakaw si Jesus sa tibuok dapit sa lungsod sa Galilea ug ang mga kapundukan nagasunod Kaniya. Unsa iyang gihimo aron makuha niya ang katahuran sa mga katawhan?
4. Unsang unang panghitabo nga pag-ayo nga nahisulat sa libro sa Mateo?
5. Unsa ang suliran sa usa ka kapitan nga kasundalohan sa Romanhon?

6. Diing dapita nagpuyo ang duha ka giyawaan na tawo? Unsang klaseng mga tawo sila?
7. Unsay nahitabo sa dautang espiritu sa dihang nakita nila si Jesus?
8. Unsay nahitabo sa dautang espiritu sa dihang mibiya sila sa katawhan?
9. Unsay nahitabo sa mga baboy?
10. Unsay reaction sa tag-iya sa mga baboy?
11. Unsang klaseng tawo si Mateo?
12. Si Jesus nakigsalo sa unsang klaseng mga tawo?
13. Unsa ang gihunahuna sa Pariseo samtang nakigsalo si Jesus sa mga kobrador ug makasasala?
14. Unsa ang gitubag ni Jesus sa Pariseo?

Leksyon 3

Espirituhanong Kamatuoran

Mateo 4-9

1. Si Jesus wala naghimo ug kalainan taliwala sa mga tawo.

Una nga disipulo ni Jesus usa ka mananagat, yano lang na tawo ug walay tarong na kinaadman.

- ◆ Ang paralitiko nga tawo, gina-salikway sa mga katawhan kay tungod sa iyang balatian sa panit sa diin gibyaan nga kibag ug gibiyabiay.
- ◆ Ang Romanhon nga kasundalohan usa siya nga kimpang sa diin walay salapi ug walay trabaho.
- ◆ Si Mateo usa ka kobrador sa buhis, lagmit nga adunahan, apan limbongan ug kawatan.
- ◆ Ang duha ka mga tawo nga nasudlan ug dautang ispiritu gitamay sa ilang kaugalingon lungsod, diin ang mga katawhan mas gihatagan ug bili ang mga baboy kaysa sa mamaayo ang mga tawo. Sa tinuud lang, kini nga mga tawhana maoy nakigpuyo sa mga tawo nga nasudlan ug dautang ispiritu maoy nagpuyo sa mga lubnganan.

***Apan ang tanang tawo mahinungdanon ug bililhon diha kang Jesus. Usa ka nga tawo nga takus ug angay ug bililhon sa panan-aw sa Dios**

2. Si Jesus adunay gahum sa pag-ayo sa atong balatian. Unsa halimbawa na sugilanon sa diin ang mga katawhan naayo sa ilang mga balatian?
3. Si Jesus mas labaw ug gamhanan sa tanang espiritu or sa yawa. Adunay mga tawo nga nahiapil sa mga demonyo or ispiritu, tungod kay nagdahum sila sa pagbuhat sa mga maayo. Apan una nila mahibaloan ang mga nagakahitabo kanila, kini nga mga demonyo maoy nagmando na kanila. Sila gisundan ug gisakit niini nga mga demonyo nga dili na buopt pang mubiya kanila. Kini nga mga tawo walay gahum sa pagpahawa niini nga mga demonyo sa ilang kianbuhi. Si Jesus lamang ang adunay

awtoridad ug gahum labaw sa mga demonyo ug ispiritu niining kalibutana. Makabaton kita ug kagawasan gikan sa mga dautang ispiritu pinaagi lamang kang Jesus.

4. Gihigugma ni Jesus ang katawhan, dautan man. Gidawat niya ang mgamakasasala. Si Jesus wala nagsalikway sa katawhan, pero ang Iyang tinguha sa matag-usa mao ang pagkabig nga maghinulsol ug mangayo ug kapasayloan.
5. Ang relihiyoso nga mga tawo, or pariseo, wala naghinulsol sa ilang kasal-anan, ug bisan mas maayo pa sila sa makasasala nga nakigsalo kay Jesus. Unsay maayo: ang tawo nga adunay dako na sala apan napasaylo na, or ang tawo nga gamay'ng sala apan nagdumili sa paghinulsol?

Layo ra kaayo nga mas maayo ang adunay dakog sala apan napasaylo na.

Gidawat ta ni Jesus ug Gihigugma ta niya bisan unsa pa ta na pagkatawo. Dili hinungdanon sa Iya kung makasasala, kung kita kabus, bisan gamay ra atong kinaadman, bisan daghan ta ug suliran or aduna tay balatian. Sa iyang panan-aw, managsama ra tang tanan. Ang mahinungdanon na butang para sa ato mao ang paghinulsol ug pagsunod sa Iya.

Leksyon 4
“Ang Pagtudlo ni Jesus”
Mateo 10-16

“Kaluoy ang akong gusto, dili mga halad.” Mateo 12:7

Balik Pagtuon

1. Natawo si Jesus sa Judio na babae, iyang ngalan _____.
2. Ang mga Maalamanon (3 ka mago) nakaplagan nila si Jesus kay tungod sa pagsunod nila sa _____.
3. Ang Maalamanon (3 ka mago) namauli sila agi sa laing dalan kay gipahimatngonan sila sa Dios sa dili _____ kay si Herodes.
4. Si Juan Bautista nagpuyo sa kamingawan nagwali ug _____ sa mga tawo nga naghinulsol sa ilang mga sala.
5. Unsay buot pasabot sa pulong na “hinulsol”?
6. Si Jesus mikawas gikan sa tubig ug Ang _____ nagpaubos sa iya nga daw salampati ug mitugdon Kaniya, ug unya ang Amahang Dios nagsulti gikan sa langit, “Kini mao ang pinangga kong Anak nga nakalipay kanako pag-ayo.” Kini nagapamatuod sa tulo ka persona sa Dios “trinity” Dios _____, Dios _____ ug Dios _____.
7. Sa kamingawan, Si Jesus gitintal sa _____.
8. Ang unang tinun-an ni Jesus usa ka _____ ingon iyang trabaho.
9. Si Jesus naka nakigtagbo ug duha ka tawo nga giyawaan. Gi-unsa ni Jesus sa pagtabang kanila? Unsa ang reaction sa mga katawhan sa gihimo ni Jesus?
10. Ang Pariseo gi saway niya si Jesus kay tungod nakigsalo siya, unsang klaseng mga tawo kini?
11. Mas maayo ang adunay’ng dako na sala sa diin naghinulsol, or usa ka tawo nga gamay’ng sala apan dili mahinulsanon na kas-ing-kasing?

Gitawag ni Jesus ang dose ka mga tawo aron mahimo Ni-
yang mga disipulo, nagpasabot, aron mahiduol Kaniya ug matud-

loan Niya. Iyang gihatagan ang dose ka mga tinun-an ug gahum labaw sa mga dautang ispiritu, uggitugutan Niya sila sa pag-ayo sa tanang klase nga mga sakit. Gisultian Niya sila sa kinasingkasing nga paghatag tungod kay gihatagan pud sila. Si Judas maoy usa kanila nga gipadala.

Sila gipadala ni Jesus sa matag-dapit sa siyudad sa Israel aron sa pagtawag sa tanang mga Judio sa aghinulsol ang pagbaton ug pagtoo diha kang Jesu Kristo. Gihataga ni Jesus ang mga tinun-an niining mensahe, "Kun kinsa man ang magpadayag Kanako diha sa mga katawhan, ako usab nga ilhon diha sa Akong Amahan nga anaa sa langit. Apan sa mga tawo nga magluib ug dili mag-ila Kanako, dili usab nako siya ilhon diha sa Akong Amahan".

Ug si Jesus nagbisita sa tannag dapit sa Galilia, nagatudlo, nagawali ug nag-ayo sa klase-klase nga mga balatian. Apan ang mga katawhan sa Galilea, uban kadtong mga tawo nga uban ni Jesus sa dako nga panahon mismo ang mga wala nagtoo ug nagsalikway sa Iyang mensahe. Ang siyudad sa Capernaum, diin gisugdan ni Jesus ang iyang publiko nga pagministeryo usab nagsalikway Kaniya. Ug sa pagkakita niini nga situwasyon, si Jesus nakigsulti sa Iyang Amahan ug miingon:

“ O Amahan, Ginoo sa langit ug yuta! Nagpasalamat ako kanimo kay gipadayag man nimo ngadto sa mga walay kahibalo kining mga butanga nga imong gitago gikan sa mga maalamon ug sa mga makinaadmanon. Oo, Amahan, natuman kini kay mao man ang imong gusto ug pagbuot. Ang akong Amahan naghatag kanako sa tanang butang,. Walay nakaila sa Anak gawas sa Amahan ug walay nakaila sa Amahan gawas sa Anak ug kadtong gma tawo nga buot sa Anak makaila sa Amahan. Duol kamo kanako, kamong tanan nga gikapuyan ug gibug-atan sa inyong gipas-an ug papahulayon ko kamo. Isangon ang akong yugo ug sundan ninyo ako kay malumo ako ug mapaubsanon sa espiritu ug makapahulay kamo. Sayon ang yugo nga akong isangon kaninyo ug gaan ang ipapas-an ko kaninyo.

Human sa pagsulti niini nga mga pulong, si Jesus u gang iyang mga tinun-an naglatas sa kaumahan sa trigo. Gigutom ang iyang mga tinun-an busa nangutlo silag uhay sa tigo aron ilang kanon. Kini nga adlaw, adlaw sa igpapahulay.

Leksyon 4

Espirituhanong Kmatuoran

Mateo 10-16

1. Kadtong mga mag-ila sa panaglan ni Jesus diha sa katawhan. Si Jesus usab mag-ila kaniya diha sa Amahan. Apan kadtong mag-limod kay Jesus diha sa mga katawhan, Siya usab ilimod ni Jesus dinha sa Amahan.
2. Daghan ang mosunod kang Jesus tungod kay gusto lamang nila makabaton ug milagro gikan kaniya. Apan dili nila gusto nga makabaton ug relasyon uban kaniya. Dili nila gusto motuman sa mga pulong niya. Dili nila gusto maghinulsol gikan sa ilang mga kasal-anan. Gusto lamang nila magpahimulus sa kaluoy sa Amahan. Karon, adunay bay mga tawo nga sama niini? May nailahan ka ba?
3. Si Jesus lamang ang adunay alagian ngadto sa Amahan ug kadtong moduol sa Amahan pinaagi kang Jesus. Walay laing manlalaban kondi si Jesus lamang. Adunay usa ka Dios, ug usa lamang ang dalan aron makaduol Kaniya ug ang Biblia nagtudlo nga ang dalan mao si Jesus.

***Siguro ikaw gitudloan sa pag-ampo sa Dios pinaagi sa daghang tigpataliwala gawas pa kay Jesus. Kinsa kining lain nga mga tigpataliwala: mga Dios Dios, propeta ug mga maayong tawo kaniadto? Ang Biblia nagsulti ng adunay mga maayong tawo, apan dili sila Dios. Uyon ka ba sa gipahayag sa Biblia nga adunay USA lamang ka tigpataliwala tali sa Dios ug sa tawo, si Cristo Jesus?**

4. Gusto ni Jesus ang pagpas-an sa atong mga kaguol ug mga gipangpas-an nga mga problema. Siya maluluy-on ug malumo ug kasingkasing. Gusto niya nga gawasnon kita sa atong mga gipangpas-an nga gibug-aton sa kinabuhi. Pinaagi kay Jesus, makabaton kita ug kapahulayan sa atong mga kinabuhi kon atong dawaton ang iyang yugo, nagpasabot, nga dawaton nato ang iyang pagka-Ginoo sa atong kinabuhi. Siya ang magadumala sa atong kinabuhi.

5. Adunay dakong kahangawa si Jesus sa atong mga pisikal nga panginahanglan. Ang mga tinun-an gigutom, ug nagtagana kanila ug pagkaon, bisan tuod nga kini magpalagot sa mga Pariseo ug makahagad ug pag-antos gikan sa mga Pariseo. Ang magbubuhat sa kalibotan adunay kabalaka sa atong mga panginahanglan.

“Kaluoy ang akong gusto, dili ang mga halad.” Unsa ang buot ipasabot sa pulong “halad o sakripisyo” diha kanimo? Gitudloan ka bas a mga mamumuno sa relihiyon sa pagbuhat ug mga halad ngadto sa Dios, siguro aron ng amakadawat ka ug pabor o kapasayloan sa imong sala? Lisud ba alang kanimo ang pagtuo nga dili buot sa Dios nga kinahanglan ikaw maghatag ug mga kapamatuoran sa imong pagsimba kaniya pinaagi sa mga halad? Ikaduhang higayon na kini nga si Jesus naghatag katin-awa sa mga Pariseo nga ang Dios wala nahimuot sa mga tawhanong sakripisyo o halad. Apan ngadto sa mga tawo nga relihiyoso dili kini sayon nga dawaton. Ang tanang mga relihiyon nagtudlo nga kinahanglan magbuhat kita ug butang aron nga malikayan ang kasuko Sa Dios ug makabaton ug pabor gikan kaniya. Daghang mga tawo naglisud sa sa pagpaningkamot sa pagbayad sa Dios alang sa ilang mga nabuhat na saad, pagbayad sa mga milabay na sala, o pagpakita sa ilang pagkamatinumanon sa Dios. apan wala kini bili atubangan sa Dios. Gusto niya ang relasyon gikan kanato. Gusto niya magpakita ug kaluoy kanato; dili niya gusto ang atong mga sakripisyo. Nahibaloan ni Jesus nga kinahanglan niya ang pag-antos sa daghang butang ug mamatay. Apan human sa tulo ka adlaw siya mabanhaw. Kini usa sa mga plano sa Dios. Gisugid ni Jesus kini sa iyang mga tinun-an apan wala nakasabot ang iyang mga tinun-an nganong kinahanglan siya mamatay ug mabanhaw.

* Sa ulahing tulo ka mga Leksyon niini nga pagtuon, atong paningkamotan sa pagsabot ang importansiya sa kamatayon ug pagkabanhaw ni Jesus. Kini nga talagsaong panghitabo mag-usab sa kasaysayan sa kalibotan hangtud sa kahangtoran. Kini nga panghitabo adunay gahom sa pagbuntog gapus sa sala ug pag-usab sa atong kinabuhi.

Leksyon 5

“Ang pagbudhi kang Jesus”

Mateo 20-26

“Samtang nagtungas si Jesus paingon sa Jerusalem, nagpalain siya ug ang napulogduha ka tinun-an ug giingnan niya sila, “Pamati kamo: nagpadulong kita sa Jerusalem ug didto ang Anak sa tawo itugyan ngadto sa kadagkoan sa mga pari ug sa mga magtutudlo sa Balaod. Siya hukman nila sa kamatayon ug unya itugyan nila ngadto sa mga dili Judio. Bugalbugalan siya ug ilatigo ug ilan-sang sa krus. Apan sa ikatulo ka adlaw, banhawon siya.” Mateo 20:17-19.

Balik Pagtuon:

1. Si Jesus natawo pinaagi sa usa ka birhen nga ginganlan ug _____.
2. Ang iyang amahan, _____, nagdamgo diin ang Dios nagsulti kaniya sa pag-adto sa Ehipto kay si Haring Herod gusto _____ si Jesus.
3. Si Juan Nga Magbubunyag nagpuyo sa kamingawan ug nagwali ug nagbautismo sa mga _____ gikan sa ilang mga kasal-anan.
4. Si Jesus walay _____, apan iyang gihangyo si Juan nga Magbubunyag sa pag-bautismo kaniya.
5. Unsa ang buot ipasabot sa “paghinulsol?”]
6. Sa dihang gibautismohan si Jesus, ang _____ mikunsad kaniya sama sa usa ka salampati ug ang tingug sa Dios nadungog ng anag-ingon, “Kini ang akong _____ diin ako nahimuot gayod.”
7. Sa kamingawan, si Jesus gitintal sa _____.
8. Nahinagbo ni Jesus ang duha ka gisudlan ug _____. Gipakita ni Jesus ang iyang gahom sa _____ ug mga demonyo.
9. Unsa man mas maayo, mahimong usa ka tawo nga makasasala

apan naghinulsol o usa ka tawo nga adunay gamayng mga sala apan wala gayod naghinulsol.

10. Si Jesus nagsulti nga kon imo siyang isugid ug ilhon atubangan sa katawhan, siya _____ kanimo atubangan sa iyang _____ sa langit.
11. Daghang mga Galilean, uban ang mga tawo gikan sa Capernaum, _____ ang pulong sa Dios; nagsunod lamang sila kang Jesus tungod sa mga milagro nga iyang gibuhat.
12. Dili nila buot maghinulsol gikan sa ilang mga kasal-anan. Sa makausa pa, unsa man ang buot ipasabot sa pulong “paghinulsol?”
13. Si Jesus nagsulti nga siya maghatag ug _____ sa tanan nga masulub-on ug adunay mga gibug-aton sa kinabuhi kay ang iyang yugo _____.
14. Ang mga Pariseo dili gusto nga si Jesus mag-ayo sa usa ka tawo nga adunay kimay tungod kay kadto _____ nga adlaw, ug lapas sa balaod ang pagpamuhat sa adlaw nga _____.
15. Ang mga Pariseo nagbuhat ug mga plano sa _____ kang Jesus.
16. Nasayod si Jesus sa planong pagpatay kaniya sa mga Pariseo, apan nagpadayon siya sa pagbuhat ug mga milagro apil niini ang pagpadaghan sa duha ka _____ ug pipila ka mga _____ aron sa pagpakaon sa upat ka liboan ka mga tawo.

Si Jesus uban ang iyang mga tinun-an nangadto gikan sa Galilea ngadto sa Jerusalem. Gisugo niya ang duha sa iyang mga tinun-an sa pag-agi sa usa ka baryo ug pagkuha sa usa ka asno uban ang nati niini kay kinahanglan kini ni Jesus. Misakay si Jesus niini samtang nagpadulong siya sa siyudad sa Jerusalem.

Misulod si Jesus nga puno sa kahimayaan ug kadaugan. Usa ka dakong panon sa mga tawo ang nagpalibot kaniya ug nagbuklad sa ilang mga sapot didto sa dalan samtang ang uban namutol ug mga sanga sa kahoy ug gikatag nila sa agianan. Ang mga tawo nga nag-una kang Jesus ingon man ang mga nagsunod kaniya naninggit, “Hosanna – dalaygon ang Kaliwat ni David! Bula-han siya nga mianhi sa ngalan sa Ginoo! Dalaygon ang Dios!

Sa pagsulod ni Jesus sa Jerusalem, nagkaguliyang ang tibuok siyudad. Nangutanan ang mga tawo, “Kinsa man kini Siya?.” Sila mitubag, “Si Jesus! Siya ang propeta nga taga Nazaret sa Galilea.”

Unya si Jesus misulod sa Templo ug gipapahawa niya ang tanan nga namalit ug namaligya didto ug gipangtuwad niya ang mga lamesa sa mga tigkambyo ug kuwarta ug ang mga lingkoranan sa mga nagbaligyag salampati. Siya miingon kanila, “Nasulat sa Kasulatan nga ang Dios miingon, ‘Ang akong balay paganganlag balay-alampoanan,’ apan gihimo ninyo kini nga tagoanan sa mga tulisan!.” Human sa iyang pagpabilin sa Templo, giayo niya ang mga buta ug mga bakol nga miduol kaniya.

Human nga gitudloan ni Jesus ang mga tawo ug daghang mga butang, human nga nagpakita siya ug mga daghang mga milagro didto sa Templo, ang kaparian ug mga pangulo sa relihiyon naghiusa aron sa pagplano sa pagpatay kaniya. Sila naghisgot sa unsang pamaagi nga siya mapatay. Apan miingon sila nga kinahanglan dili kini itunong sa kasaulogan kay tingali unyag maghimog kagubot ang mga tawo.

Unya ang usa sa mga tinun-an nga ginganlag Judas Iscariote, miadto sa kadagkoan sa mga pari ug miingon, “Unsa may inyong iganti kanako kon itugyan ko kaninyo si Jesus?.” Miihap sila ug katloan ka salapi nga sinsilyo ug gihatag kini kaniya. Sukad niadtong adlaw si Judas nangitag maayong higayon sa pagbuhdi kang Jesus.

Sa unang adlaw sa Kasaulogan, ang mga tinun-an nagandam ug panihapon sa Kasaulogan sa Pagpasaylo sumala sa giingon ni Jesus kanila. Sa pagkagabii, si Jesus milingkod uban ang iyang mga tinun-an sa kan-anan ug si Jesus miingon kanila, “Sultihan ko kamo, usa kaninyo magbudhi kanako.” Nangaguol pagayo ang mga tinun-an ug ang tagsatagsa kanila nangutana kaniya, “Ginoo ako ba ang imong gipasabot?”

Si Jesus mitubag, “Ang nagtuslob sa pan uban kanako niining panaksan maoy magbudhi kanako. Ang Anak sa Tawo mamatay sumala sa giingon sa Kasulatan apan alaot siya nga magbudhi sa Anak sa Tawo! Maayo pa lang untag wala siya matawo!”

Si Judas, ang traydor, miingon, “Magtutudlo, ako ba ang imong gipasabot?” Si Jesus mitubag, “Gisulti mo.”

Samtang nangaon sila, mikuha si Jesus sa pan, nagpasalamat sa Dios ug gipikaspikas niya kini ug gihatag sa iyang mga tinun-an. Ug miingon siya, “Dawata ninyo kini ug kan-a. kini mao ang akong lawas.” Unya gikuha niya ang kupa, nagpasalamat sa Dios ug gihatag kanila nga nag-ingon, “Inom kamong tanan niini”, siya miingon, “Kini mao ang akong dugo nga naglig-on sa kasabotan, ang akong dugo nga gipaagas alang sa daghan aron sa pagpasaylo sa mga sala.”

Human sa ilang pagpanga-on, nag-awit silag usa ka alawiton sa pagdayeg sa Dios ug nangadto sa Bungtod sa mga Olibo. Didto, si Jesus nagpadayon ug sa pagtudlo kanila ug daghang mga butang, apil niini ang mga umaabot nga panghitabo.

Unya si Jesus miadto sa usa ka dapit nga ginganlag Getsemane kuyog sa iyang mga tinun-an. Gidala niya si Pedro, Santiago ug Juan aron sa pag-uban kaniya, iyang gisultihan sila sa pagpabilin ug pagtukaw uban kaniya. Milakaw siya sa unahan, mihapa sa yuta ug nag-ampo nga nag-ingon:

“Amahan ko, kon mahimo kuhaa kanako kining kupa sa pagantos! Apan dili ang akong pagbuot maoy matuman kondili ang imo.”

Nahisulat sa Kasulatan nga giampo kini ni Jesus sa ikatulong higayon.

Sa laing bahin, ang iyang mga tinun-an dili makapabilin sa pagtukaw, kay katulgon man kaayo sila. Gibangon ni Jesus ang iyang mga tinun-an ug miingon, “Bangon kamo kay manglakaw na kita. Tan-awa, ania na ang nagbudhi kanako.”

Pinulong nga mga Pangutana

1. Unsa man ang gigamit ni Jesus aron nga masakyan niya padulong sa Jerusalem?
2. Giunsa man sa pagtagad sa mga tawo si Jesus sa iyang pagsulod sa siyudad?
3. Giunsa pagbudhi ni Judas si Jesus?
4. Unsa nga kasaulogan ang gi-selebrar sa siyudad?
5. Giunsa pagpahibalo ni Jesus si Judas nga siya nasayod nga si Judas maoy magbudhi kaniya?
6. Unsa man ang gisulti ni Jesus mahitungod sa bino nga naa sa

kupa samtang sila nanihapon?

7. Sumala kang Jesus, nganong gikinahanglan man ang pagpagas sa iyang dugo didto sa krus?
8. Miadto si Jesus kuyog ang iyang mga tinun-an ngadto sa Getsemane aron sa pag-ampo. Pila sa iyang mga tinun-an nga nagpabilin sa pagtukaw aron sa pag-ampo?
9. Unsa ang pag-ampo ni Jesus nianang gabii sa pagbudhi kaniya?

Leksyon 5

Espirituhanong Kamatuoran

Mateo 20 – 26

1. Ang Ginoo ang nagkontrolar sa tanang mga butang. Ang mga Pariseo naglaraw sa kalit na pagdakop kang Jesus. Apan ang Dios, sa tibuok panahon, gigamit sila aron nga matuman ang iyang pagbuot sa kalibotan. Pagbuot sa Dios ang kamatayon ni Jesus didto sa krus.
2. Ang Dios nasayod sa kon unsa ang naa sa atong mga kasing-kasing diin wala nahibaw-i sa uban. Si Jesus, sa tibuok panahon, nasayod nga ang iyang tinun-an nga si Judas, maoy magbudhi kaniya.
3. Si Jesus nahigugma kanato ug nagtagad ug naghatag kanato ug susamang gugma bisan isalikway nato siya. Gitagad ni Jesus si Judas ug maayo na bisan ang mga tinun-an dili makatuo nga siya mao ang traydor. Sa susamang paagi, si Jesus nahigugma kanato ug nagtagad kanato na adunay puno sa gugma bisan tuod sa daghang higayon kita nagsalikway sa iyang kabubut-on sa atong kinabuhi ug naglimod kaniya.
4. Ang dugo ni Jesus giula aron sa kapasayloan sa atong mga kasal-anan. Ang mga tinun-an nniadtong panahona, wala nakasabot sa kamatuoran nga si Jesus kinahanglan mamatay. Wala nila nasabtan nga nagkinahanglan ug bayad ang sala sa matag-usa ug ang bayad mao ang pagpa-ula sa dugo. Sila nasayod nga si Jesus nahigugma kanila ug sila gipasaylo sa ilang mga sala. Apan nagkinahanglan ug igo nga panahon aron nga ilang masabtan ang dakong presyon nga gibayad ni Jesus aron maghatag kapasayloan sa ilang mga sala.

* Daghang mga tawo ang nasayod nga aduna silay mga sala sa ilang mga kinabuhi. Ang uban nabati ang kasaysayan ni Jesus, nga si Jesus nahigugma kanila. Apan pipila lamang ang nasayod nga nagkinahanglan ang Dios ug pagpaula sa dugo nga maoy bayad sa sala. Si Jesus, kay siya man ang Dios, mao lamang ang nagpabilin nga nagpuyo sa kalibotan nga walay sala. Tungod sa iyang dakong gugma alang kanato, gipili niya ang paghatag sa iyang kaugalingon isip usa kasakripisyo aron sa pagbayad sa sala ug dili lamang alang kanato apan sa sala sa tibuok kalibotan. Tungod niini nga sakripisyo, aduna kitay oportunidad nga makadawat ug kapasayloan sa atong mga kasal-anan ug kalinaw diha sa Dios.

* Sa sunod semana, atong tan-awun ang mga detalye sa paglansang kay Cristo.

Leksyon 6
“Ang Pagpalansang ni Cristo”
Mateo 26 -27

“Si Jesus mitubag kaniya, “Gisulti nimo. Apan sultihan ko kamong tanan: sukad karon makita ninyo ang Anak sa Tawo nga naglingkod sa tuo sa Labing Makagagahom sa tanan ug moanhi sinapnay sa mga panganod sa langit.” Mateo 26:64

Balik Pagtuon:

1. Si Jesus natawo pinaagi sa usa ka birhen nga ginganlan ug _____.
2. Sumala sa Kasulatan, si Jesus natawo sa siyudad sa _____.
3. Sumala sa Kasulatan, Si Jesus migawas sa lugar sa _____, tungod kay miikyas sila gikan kang Haring Herod.
4. Ang amahan ni Jesus, nga mao si _____, nagdamgo nag nagsugyot nga mobalik sila sa Israel kay si Haring Herod namatay na. si Jose, tungod sa iyang kahadlok sa anak ni Haring Herod, gibalhin ang iyang pamilya sa probinsiya sa _____ sa siyudad nga gitawag ug Nazaret.
5. Gisugdan ni Jesus ang iyang publiko nga pag-ministeryo pinaagi sa pagbautismo kaniya ni _____.
6. Sa dihang mikawas gikan sa tubig, ang _____, sama sa salampati, mipanaug gikan sa langit, apil niini ang tingug sa _____ nga nagsulti gikan sa kalangitan ug miingon, “Kini mao ang akong Anak nga nakalipay kanako pag-ayo.”
7. Giaayo ni Jesus ang daghang mga tawo ug gipasaylo niya ang ilang mga _____.
8. Bisan pa sa daghang mga milagro, daghang gihapon sa mga katawhan sa rehiyon sa Galilea ang nag _____ sa mensahe ni Jesus, ug dili nila buot maghinulsol gikan sa ilang mga kasal-anan.

9. Unsa ang buot ipasabot sa pulong “paghinulsol?”
10. Sa dihang nagpadulong si Jesus sa siyudad sa Jerusalem adunay dakong panon sa katawhan ang nagsunod kaniya. Si Jesus naglingkod sa _____.
11. Sa kagabhion sa selebrasyon sa Kasaulogan, gisultian ni Jesus ang iyang mga tinun-an nga usa kanila _____ kaniya. Sa maong takna, wala ni bisan kinsa ang nasayod kon kinsa kadto.
12. Naghisgot si Jesus sa bino nga ilang giinom. Siya miingon nga nagrepresenta kadto sa iyang dugo nga iula alang sa _____ sa sala.
13. Ang mga tinun-an nakadungog niini nga mga pulo apan wala nila gihapon masabtan nga si Jesus kinahanglan nga _____ alang sa ilang mga kasal-anan.
14. Human sa ilang panihapon. Sila miadto sa Bungtod sa Olibo ug didto usab sa Getsemane. Nag-ampo si Jesus tibuok gabii samtang ang iyang mga tinun-an _____.
15. Si Jesus nag-ampo, “Amahan ko, kon mahimo kuhaa kanako kining kupa sa pag-antos! Apan dili ang akong pagbuot maoy matuman kondili ang _____ maoy matuman.”

Samtang nagsulti pa si Jesus niabot si Judas nga usa sa napulog-duha ka tinun-an uban ang daghang tawo nga nagdalag mga espada ug mga puspos. Sinugo sila sa kadagkoan sa mga pari ug sa mga namunoan sa mga Judio. Ang traydor naghatag kanila ug usa ka ilhanan; “Ang tawo ng aakong hagkan mao ang inyong gipangita. Dakpa siya!” Unya miduol dayon si Judas kang Jesus ug miingon, “Magtutudlo, ang kalinaw mag-uban kanimo”, ug gihagkan niya si Jesus. Si Jesus mitubag, “Higala, buhata dayon ang buot mong buhaton!”

Unya miduol sila kang Jesus ug ila siyang gidakop. unya usa niadtong kauban ni Jesus miibot sa iyang espada ug gitigbas ang ulipon sa pangulong pari ug naputol ang usa sa iyang dalunggan. Unya miingon si Jesus kaniya, “luli sa sakuban ang imong espada kay ang maggamit sa espada, sa espada usab mamatay. Wala kaba masayod nga makahimo ako pagpakitabang sa akong Amahan ug ipadala dayon niya kanako ang kapin sa napulog-duha ka panon sa mga anghel? Apan kon buhaton ko kini, unsaon man

pagkatuman sa Kasulatan nga nag-ingon nga kinahanglan mahitabo kini?.”

Unya miingon si Jesus sa mga tawo, “Tulisa ba ako nga nagdala pa man gayod mog mga espada ug puspos sa pagdako kanako? Matag adlaw nagtudlo ako didto sa Templo apan wala ako ninyo dakpa. Apan kining tanan nahitabo aron matuman ang gisulat sa mga propeta diha sa Kasulatan.”

Unya mibiya kaniya ang tanang tinun-an ug nanagan.

Gidala si Jesus sa mga tawo nga nagdako kaniya ngadto sa balay ni Caifas, ang pangulong pari, diin nagkatigom ang mga magtutudlo sa Balaod ug ang mga pangulo sa mga Judio. Ang kadagkoan sa mga pari ug ang tibuok hukmanan naningkamot pag-pangitag ikabutangbutang nila batok kang Jesus aron mapatay nila siya.

Apan wala gayod silay nakita nga sayop bisan daghan na ang miadto ug nagsugilon ug mga bakak mahitungod kaniya. sa katapusan may duha ka tawo nga miduol ug miingon, “Kining tawhana nag-ingon, makahimo ako sa pagguba sa Templo sa Dios ug pagpatindog niini sa tulo ka adlaw.”

Nitindog ang pangulong pari ug miingon kang Jesus, “Wala ka bay ikatubag niining sumbong batok kanimo?” Apan wala motubag si Jesus.

Busa ang pangulong pari misulti pag-usab kaniya, “Sa ngalan sa Dios nga buhi, papaumpaon ko ikaw: sultihi kami kon ikaw mao ba ang Mesiyas, ang Anak sa Dios.” si Jesus mitubag kaniya, “Gisulti nimo. Apan siltihan ko kamong tanan: sukad karon makita ninyo ang Anak sa Tawo ng naglingkod sa tuo sa Labing Makagagahom sa tanan ug moanhi sinapnay sa mga panganod sa langit!”

Sa pagkabati niya niini, gigisi sa pangulong pari ang iyang bisti ug miingon, “Dako pasipala! Wala na kita magkinahanglan pag dugang nga mga saksi! Dinhi karon nadungog ninyo ang iyang pag-pasipala! Unsay inyong hunahuna?” Ug sila mitubag, “Sad-an siya ug kinahanglan patyon.”

Unya gilud-an nila ang iyang nawong ug gibunalan nila siya. kadtong misagpa kaniya miingon, “Tag-ana, Mesiyas, kon kinsay nagsagpa kanimo!”

Sayo sa buntag ang tanang kadagkoan sa mga pari ug ang mga namunoan sa mga Judio nagplano sa pagpatay kang Jesus. Gigapos nila siya ug gitugyan ngadto kang Pilato, ang Romanhong Gobernador.

Si Jesus nagtindog atubangan sa Romahong Gobernador ug gipangutana siya sa Gobernador, “Ikaw ba ang hari sa mga Judio?” Si Jesus mitubag, “Gisulti nimo.” Apan wala niya tubaga ang mga sumbong sa kadagkoan sa mga pari ug sa mga punoan sa mga Judio. Busa miingon si Pilato kaniya, “Wala ka ba makadungog sa tanan nilang mga sumbong batok kanimo?” Apan wala motubag si Jesus bisan usa ka pulong, busa natingala pag-ayo ang Gobernador.

Matag Kasaulogan sa Pagpasaylo, nabatasan sa Gobernador ang pagbuhig usa ka binilanggo nga pinangayo sa mga tawo. Niadtong mga panahona may bantogang binilanggo nga ginganlag Barabas. Sa nagkatigon na ang mga tawo, nangutana si Pilato kanila, “Kinsa may inyong gusto nga akong buhian? Si Barabas ba o si Jesus nga ginganlag Mesiyas?” Nangutana si Pilato niini kay nasayod man siya nga ilang gitugyan si Jesus kaniya tungod sa kasina.

Samtang naglingkod si Pilato didto sa lawak-hukmanan, nagpadala kaniyang mensahe ang iyang asawa nga nag-ingon, “Ayaw paghilabti kanang tawhana nga walay sala kay nasamok ako pag-ayo tungod sa akong damgo mahitungod kaniya.”

Gidani sa kadagkoan sa mga pari ug sa mga pangulo sa mga Judio ang mga tawo sa pagpangayo kang Pilato nga buhian niya si Barabas ug ipapatay si Jesus. unya nangutanan pag-usab ang Gobernador kanila, “Kinsa man niining duha ang inyong gusto nga akong buhian?” Sila mitubag, “Si Barabas!” Si Pilato nangutana kanila, “Unya, unsa may akong buhaton kang Jesus nga ginganlag Mesiyas?”

Silang tanan nanubag, “Ilansang sa krus!” “Unsa may iyang sala?”, nangutana si Pilato. Apan sa makusog nga tingog naninggit sila, “Ilansang siya sa krus!”

Sa pagkakita ni Pilato nga wala siyay mahimo ug malagmit mahitabo ang dakong kagubot, mikuha siyag tubig ug nanghunaw atubangan sa mga tawo ug miingon, “Wala akoy labot sa dugo niining tawhana! Inyo kining gusto!” Unya ang tanang mg atawo nanubag kaniya, “Kami ug ang among mga anak maoy dat-ogi sa silot

sa iyang dugo!”

Unya gibuhian ni Pilato si Barabas apan gipalatos niya si Jesus ug gitugyan arron ilang ilansang sa krus. Unya gidala si Jesus sa mga sundalo ngadto sa palasyo ni Pilato nga Gobernador ug didto gialirongan siya sa mga sundalo. Gihuboan nila si Jesus sa iyang bisti ug gisul-oban sa bisting dagtom-pula. Ug naghimo silag korona gikan sa mga sangang tunokon. Ug gipahaom nila kini sa iyang ulo. Gipakuptan nila sa iyang tuong kamot ang usa ka bugang. Nagluhod sila sa iyang atubangan ug gibugalbugalan siya. Miingon sila, “Mabuhi ang Hari sa mg Judio!” Unya gilud-an nila siya ug gikuha nila ang lipak ug gibunal sa iyang ulo. Human nila buga-bugali si Jesus gihukasan nila siya sa bisting dagtom-pula ug gisul-oban sa iyang kaugalingong bisti ug gidala sa gawas aron ilansang sa krus.

Unya miabot sila sa usa ka dapit nga ginganlag Golgota, nga sa ato pa, “Ang Dapit sa Kalabera.”

Sa pagkaudtong tutok, mitabon sa tibuok yuta ang kangitngit nga milungtad ug tulo ka oras. Ug sa pagka-alastres sa hapon mi-tuaw si Jesus, “Eli, Eli, lama sabachthani?” Nga sa ato pa, “Dios ko, Dios ko, nganong gibiyaan mo ako?”

Unya si Jesus misinggit pag-usab ug namatay.

Unya ang tabil sa Templo nagisi gikan sa taas ngadto sa ubos. Nauyog ang yuta ug nangapikas ang mga bato. Ang mga lubnganan nangaabli ug daghan sa mga nangamatay nga katawhan sa Dios ang nangabanhaw ug naggula sa ilang lubnganan. Miadto sila sa Balaang Siyudad human mabanhaw si Jesus ug didto nakit-an sila sa daghang mga tawo.

Pinulong nga mga Pangutana

1. Giunsa sa pagbudhi si Jesus?
2. Usa sa mga tinun-an ni Jesus naghimo ug butang aron sa pag-dependa kang Jesus. unsa man kini ug unsa man ang rekasiyon ni Jesus?
3. Sa panahon sa pagbudhi kaniya, unsa man ang gihimo sa iyang mga tinun-an?

4. Asa man nila gidala si Jesus human siya gidakop didto sa tana-man.
5. Bisan tuod adunay daghang dili matuud nga mga saksi, giunsa nila pagsukmat si Jesus sa pagpasipala?
6. Asa gidala si Jesus sa mga pangulo sa Judio sa sayo sa kabuntagon?
7. Si Pilato, human ang iyang pag-imbistigar, walay makita nga sayop ni Jesus apan nahadlok siya sa mga tawo. Ug gipapili niya ang mga tawo. Unsa man ang iyang gipapilian niya sa mga tawo ug unsa man ang gipili sa tawo?
8. Giunsa man pagtagad sa mga sundalo si Jesus?
9. Human ang tulo ka oras sa kangitngit, misinggit si Jesus ngadto sa Dios. Unsa man ang buot ipasabot sa iyang gisinggit?
10. Unsa man ang nahitabo sa dihang gitugyan ni Jesus ang iyang Espiritu?

Leksyon 6

Espirituhanong Kamatuoran

Mateo 26-27

1. Kinsa man si Jesus? “Anak sa Tawo ng naglingkod sa tuo sa Labing Makagagahom sa tanan ug moanhi sinapnay sa mga panganod sa langit.” Mao kini ang tubag nga gihatag ni Jesus sa pangulo sa mga kaparian, ug mao kini ang tubag nga nagdala kaniya ngadto sa krus. Mao kini ang tubag nga dili madawat niadtong mga tawhana. Apan, matag tawo kinahanglan nga makig-batok sa susamang pangutana. Kinsa man si Jesus? Kay kon si Jesus naglingkod sa tuo sa Labing Makagagahom sa tanan ug moanhi sinapnay sa mga panganod sa langit, ang matag-usa kanato magdesisyon unsaon pagdawat niini ug pag-tubag kaniya.

2. Si Jesus ang nalansang puli kay Barabas, usa ka gikahadlokang criminal; ug si Barabas maoy gibuhian.

*Siguro ako dili usa ka kriminal, apan sama kay Barabas, ako usa ka makasasala ug atubangan sa Dios, ako usab makaangkon ug kamatayon bayad sa sala. Ang Biblia nagsulti diha sa Roma 6:23, “Kay ang bayad sa pagpakasala mao ang kamatayon.” Kini nagpasabot na angayan lamang nga kita mamatay tungod sa mga dautang butang nga atong nabuhat sa atong kinabuhi. Dili sukaranan ang kadaghanon sa sala, sama sa kaso ni Barabas, o kon kita maayo nga tawo sama sa iyang mga tinun-an.

3. Gilatigo si Jesus, gihukman ug gipatay aron sa pagbayad sa atong mga kasal-anan. Mao kini ang rason nganong miadto si Jesus dinhi sa kalibotan. Gusto niya nga makatindog kita diha atubangan sa Amahan nga adunay kapasayloan sa atong mga kasal-anan. Ang uban magsulti nga si Jesus usa ka martir o propeta. Apan dili kini tinuod sumala sa gisulti ni Jesus. Giangkon niya nga siya ang Dios ug miadto siya sa kalibotan aron sa pagpakamatay alang sa atong mga kasal-anan.

4. Gitugyan ni Jesus ang iyang Espiritu. Daghang mga higayon nga puwede ni Jesus mohawa sa krus. Mamahimo niyang pamatyon ang mga tawo nga nagbugalbugal kaniya pinaagi lamang sa usa ka pulong. Apan, mas gipili niya ang pag-antos ug

nagpabilin sa krus hangtod sa tamang oras. Ug sa tamang oras, gitugyan niya ang iyang Espiritu. Gipili niya ang pagpakamatay alang sa pagbayad sa atong mga kasal-anan. Ang Kasulatan nagsulti diha sa Juan 3:16, “Kay gihigugma pag-ayo sa Dios ang kalibotan ug tungod niini gihatag niya ang iyang bugtong Anak, aron ang tanan nga motuo kaniya dili malaglag kondili makabaton hinuon sa kinabuhing dayon.”

*Sa sunod na Leksyon, atong tun-an ang pagkabanhaw ni Jesus. Ang kamatuoran mao nga si Jesus dili patay, apan buhi ug karon gusto niyang mosulod sa imong kinabuhi. Gusto niyang hinloan ang imong kasingkasing gikan sa sala, ug hingpit nga bagohon ang imong kinabuhi.

Leksyon 7

“Ang Pagkabanhaw ni Jesus ”

Mateo 27-28

“Unya ang anghel miingon sa mga babaye, “Ayaw kamo kahadlok! Nasayod ako nga nangita kamo kang Jesus nga gilansang sa krus. Wala na siya dinhi; nabanhaw siya sumala gayod sa iyang giingon.” Mateo 28:5-6

Balik Pagtuon

1. Si Jesus natawo pinaagi sa usa ka birhen nga ginganlag _____.
2. Gisugdan ni Jesus ang iyang publikong pagministeryo pinaagi sa _____ kaniya sa tawo nga ginganlag Juan Nga Magbubunyag.
3. Sa iyang bautismo, ang _____ mikunsad kang Jesus sama sa usa ka salampati, ug ang tingog sa Dios gikan sa langit nag-ingon, “Mao kini ang akong hinigugmang _____ nga nakalipay kanako pag-ayo.” Kini nagpakita kanato sa Tulo ka Persona: Dios _____, Dios _____ ug Dios _____.
4. Giayo ni Jesus ang daghang mga tawo nga adunay mga bala-tian ug gipasaylo niya ang ilang mga _____.
5. Bisan sa mga gipakitang mga milagro ni Jesus, daghang mga tawo nga nagpuyo sa Galilea ang nagsalikway sa iyang mga pulong ug dili buot _____ gikan sa ilang mga sala.
6. Unsa ang buot ipasabot sa pulong “paghinulsol?”
7. Si Jesus nag-ingon na ang bino nga naa sa kupa nagrepresenta sa iyang dugo nga _____ para sa tanan alang sa _____ sa mga sala.
8. Gidakop sa mga Pariseo si Jesus didto sa tanaman diin siya nag-ampo, ug gidala siya didto sa balay sa Pangulong _____ nga ginganlag Caifas.
9. Ang pangulong pari nangutana kang Jesus kon siya mao ang _____ ug si Jesus mitubag nga mao gayod siya. Ni-

ining taknaa, ang mga tawo miduol kang Jesus ug _____ ang iyang nawong, _____ siya, ug gidapatan siya gamit ang _____.

10. Sa pag-abot sa kabuntagon, gidala si Jesus sa mga Pariseo ngadto sa Romanhong Gobernador nga ginganlag _____.
11. Walay sala nga nakita ni Pilato diha kang Jesus, apan gitugotan nga siya malansang kay nahadlok man siya ug _____ nga mamahimong mahitabo sa diha sa mga tawo.
12. Ang mga Romahong Sundalo naglatigo kang Jesus. Gikoronahan nila si Jesus ug _____ diha sa iyang ulo ug gibunalan ang iyang ulo ug _____, ug gihatag nila kini aron kuptan ni Jesus.
13. Sa krus diin gilansang si Jesus, adunay gibitay nga karatola diin nahisulat ang, "MAO KINI SI JESUS, ANG _____ SA MGA JUDIO."
14. Gikan sa alas-sais hangtod sa alas-nuwebe, adunay _____ sa kalibotan.

Adunay usa ka adunahan nga tawo nga ginganlag Jose nga taga-Arimatea ug usa usab ka sumusunod ni Jesus. Kining tawhana naghangyo kay Pilato nga kung pwede niya makuha ang lawas ni Jesus ug gibutang sa iyang kaugalingong lubnganan. Paghuman niya ug butang si Jesus sa langub, ang dakong bato miligid sa pul-tahan aron masira ang lubnganan.

Pagkasunod adlaw nga mao ang Adlawng Igpapahulay, ang kadagkoan sa mga pari ug ang mga Pariseo nakigkita kang Pilato. Miingon sila, "Sir nahinumdon kami nga sa buhi pa kadtong bakakon, miingon siya, 'mabanhaw ako sa ikatulo ka adlaw.' Busa pabantaye pag-ayo ang lubong hangtod sa ikatulo ka adlaw aron dili makawat sa iyang mga tinun-an ang iyang lawas ug manugilon nga nabanhaw siya. Kining ulahing bakak mahimo unyang mas daotan kaysa unang bakak." Busa miingon si Pilato kanila, "Pagdala kamo ug guwardiya ug guwardiyahi ninyo pag-ayo ang iyang lubong." Busa nanglakaw sila ug aron pagsiguro nga walay makahilabot sa lubong, ilang gipalig-unan ang sira sa lubong ug gipaguwardiyahan.

Unya milabay ang Adlawng Igpapahulay. Sa pagkakadlawon sa Adlawng Dominggo, si Maria Magdalena ug ang laing Maria nan-

gadto aron pagtan-aw sa lubnganan. Unya sa kalit dihay kusog nga linog ug usa ka anghel sa Ginoo ang mikunsad gikan sa langit; giligid niya ang bato ug milingkod siya niini. Sama sa kilat ang iyang panagway ug puti kaayo ang iyang bisti.

Nangurog ang mga guwardiya tungod sa ilabihang kahadlok kaniya ug nakuyapan sila. Unya ang anghel miingon sa mga babaye, “Ayaw kamo kahadlok! Nasayod ako nga nangita kamo kang Jesus nga gilansang sa krus. Wala na siya dinhi; nabanhaw siya sumala gayod sa iyang giingon. Dali kamo ug tan-awa ang dapit nga gilubngan kaniya. Unya adtoa dayon ug sultih ang iyang mga tinun-an nga nabanhaw siya ug nag-una kanila karon ngadto sa Galilea. Didto ikahibalag nila siya. hinumdomi ang akong giingon kaninyo.”

Busa midali sila pagbiya sa lubnganan nga may kahadlok uban ang dakong kalipay. Nanagan sila aron pagbalita sa iyang mga tinun-an.

Unya sa kalit misugat si Jesus kanila ug miingon, “Ang kalinaw mag-uban kaninyo.” Miduol sila kaniya ug mihikap sa iyang mga tiil ug misimba kaniya. Si Jesus miingon kanila, “Ayaw kamo kahadlok; adtoa ang akong kaigsoonan ug paadtoa sila sa Galilea. Didto makita nila ako.”

Samtang nanglakaw ang mga babaye, pipila sa mga sundalo nga nagbantay sa lubnganan namauli sa siyudad ug gisuginlan nila ang kadagkoan sa mga pari sa tanan nga nahitabo. Unya ang kadagkoan sa mga pari nakigtambo sa mga pangulo sa mga Judio aron pagplano sa ilang buhaton. Ug ang mga sundalo gihatagan nila ug daghang kuwarta ug giingnan, “Ipanugilon ninyo nga sa pagkagabii ang iyang mga tinun-an miadto sa lubnganan ug gikawat nila ang iyang lawas samtang nangatulog kamo. Ug kon kini mahibaw-an sa Gobernador, kami nay mag-igo pagsulti kaniya ug wala na kamoy angay kabalak-an.”

Gidawat sa mga guwardiya ang mga kuwarta ug ilang gituman ang gisugo kanila hangtod karon mao kini ang balita nga gipakaylap sa mga Judio.

Ang napulog-usa ka tinun-an miadto sa Galilea didto sa bungtod nga paadtoan kanila ni Jesus. Ug sa ilang pagkakita kaniya, gisimba nila siya apan ang pipila kanila nagduhaduha. Miduol si Jesus ug miingon kanila, “Gihatag kanako ang tanang gahom sa langit ug sa yuta. Tungod niini, sa inyong pagpanglakaw

himoa nga akong mga tinun-an ang tanang katawhan sa tibuok kalibotan. Bunyagi sila sa ngalan sa Amahan , sa Anak ug sa Espiritu Santo ug tudloi sila sa pagtuman sa tanan nga akong gisugo kaninyo. Ug hinumdomi! Ako mag-uban kaninyo sa kanunay hangtod sa kataposa sa kalibotan. Amen.”

Pinulong nga mga Pangutana

1. Unsa man ang gipangayo ni Jose nga taga Arimethea ngadto kang Pilato?
2. Nganong nahadlok man ang mga Pariseo nga adunay mahitabo sa patay nga lawas ni Jesus sa ikatulo ka adlaw?
3. Kinsa man ang miadto sa lubnganan ni Jesus sa unang adlaw, ug unsa man ang nakaplagan nila sa pag-abot didto sa lubnganan?
4. Sa pagpadulong nila balik sa mga tinun-an ni Jesus aron pagsugid sa ilang mga nadiskubrehan, kinsa man ang ilang nasugatan?
5. Gisultihan ni Jesus ang iyang mga tinun-an nga makigkita siya kanila sa asa nga dapit?
6. Sa bungtod, adunay importante nga mando nga gihatag si Jesus sa iyang mga tinun-an: “Panglakaw kamo, himoa nga akong mga _____ ang tanang katawhan sa tibuok kalibotan, _____ sila sa ngalan sa Amahan , sa Anak ug sa _____, _____, ug tudloi sila sa pagtuman sa tanan nga akong gisugo kaninyo. Ug hinumdomi! Ako mag-uban kaninyo sa kanunay hangtod sa kataposa sa kalibotan. Amen.”

Leksyon 7

Espirituhanong Kamatuoran

Mateo 27 – 28

1. Buhi si Jesus karon. Si Jesus dili tawo nga mapreso ug mamatay. Siya ang Dios nga walay kataposan. Walay sinugdanan ug walay kataposan. Ang plano sa Dios gikan pa sa sinugdanan sa kalibotan mao ang pag-anhi sa kalibotan gamit ang dagway sa tawo isip usa ka nagsakripisyo nga sulugoon. Kabubut-on niya nga magpalansang sa krus niadto nga adlaw ug sa adto nga paagi. Ang iyang mga plano dili gayod mapakyas, walay ni bisan kinsa nga makabungkag niini. Siya nagapabilin nga Dios, ang matuod ug buhi nga Dios.
2. Ang mga Pariseo nagtuo sa pulong ni Jesus sa punto nga gisugo nila ang mga sundalo sa pag-guwardiya sa lubnganan ni Jesus human siya mamatay kay siya nagpamatuod man nga siya mabanhaw. Sila mingtuo sa testimonyo sa mga sundalo sa dihang gisultihan sila sa nahitabo. Gani ilang gibayaran ang mga sundalo nga ibakak ang pagkabanhaw ni Jesus. Kini nga mga pangulo nakasaksi usab sa dihang gibautismohan ni Juan Nga Magbubunyag si Jesus, ug ang pulong sa Dios gikan sa langit nagpamatuod nga siya mao. Kini nga mga tawo saksi usab sa mga milagro nga gipakita ni Jesus. Gani sila nasuko kaniya sa dihang giayo niya ang usa ka tawo nga adunay kimay sa Adlawng Igpapahulay. Nakita nila ang pagpahawa ni Jesus sa mga daotang Espiritu gikan sa mga tawo nga nasudlan niini, ug nasaksihan usab nila ang gihimong pagpasaylo ni Jesus sa mga tawo gikan sa sala. Ang mga Pariseo maoy mismong saksi sa kinabuhi ug mensahe ni Jesus. Apan kini nga mga tawo wala nagdawat sa gugma sa Dios nga gihatag kanila ni Jesus. Wala sila naghinulsol gikan sa ilang mga sala. Wala nila itugyan ang ilang mga kinabuhi ubos sa gahom ug awtoridad ni Jesus. Ang pagbaton ug relasyon dinha kang Jesus labaw pa sa pagkat-on ug pagtuo sa kamatuoran sa iyang kinabuhi. Labaw pa kini sa bag-o ug nagkalain-lain nga relihiyon. Ang gusto ni Jesus mao nga kita maghinulsol gikan sa atong mga sala, magtoo kaniya, ug itugyan ang atong mga kinabuhi dinha kaniya. Gusto niya nga siya maoy Dios ug pangulo sa atong mga kinabuhi. Gusto niya nga siya ang magkontrolar sa atong mga kinabuhi matag-adlaw.

3. Kinsa si Jesus?

- ◆ Si Jesus natawo gikan sa usa ka birhen.
- ◆ Giangkong ni Jesus nga siya mao ang Dios.
- ◆ Si Jesus naghimo ug daghang milagro ug iyang gipasaylo ang mga sala sa katawhan nga naghinulsol.
- ◆ Si Jesus nagbayad sa ilang mga sala didto sa krus sa dili pa moabot ang paghukom.
- ◆ Si Jesus nabanhaw gikan sa mga patay ug buhi siya karon.
- ◆ Kabubut-on usab ni Jesus nga ako maghinulsol gikan sa akong mga kasal-anan ug magtugyan sa akong kinabuhi diha kaniya.

Ang Balaang Kasulatan nagpamatuod kanato nga si Jesus wala namatay aron mahimong ehemplo, siya namatay puli kanato aron nga kita takus nga moatubang diha sa Dios.

“Sumala sa Kasulatan, “Ang tanan nga nagsangpit sa ngalan sa Ginoo, maluwas.” Roma 10:13

- Kini nagpasabot ng abisan unsa pa ako kaniadto, makahangyo ako kang Jesus nga magpuyo sa akong kinabuhi ug pasayloon ako gikan sa akong mga sala ug magpuyo siya dinhi kanako.
- Kini nagpasabot nga sa diha nga si Jesus naa na sa akong kasingkasing, ang akong mga sala kaniadto, karon ug sa umaabot iya nang GIPASAYLO. Kini walay labot sa mga maayo nako ng abuhat. Dili tungod kay gipili nako ang maayo nga relihiyon. Dili tungod kay ako maayong tawo. Dili tungod kay ang akong ginikanan lumad o halangdon nga mga tawo. Kining tanan tungod sa pagdawat nako kang Jesus nga namatay didto sa krus tungod sa akong mga kasal-anan.
- Kini nagpasabot nga sugod karon, balaan ako diha sa panan-aw sa Ginoo. Ang Balaang Kasulatan nagtudlo nga ang bayad sa sala mao ang kamatayon, apan ang kamatayon ni

Jesus igo na nga ako mabag-o kon akong pillion ang pag-sunod kaniya.

Kon gusto ka nga maangkon nimo ang kapasayloan sa imong sala karon ug gusto nga ikaw mahimong matuod nga sumusunod ni Jesus, hangyoa siya nga magsulod sa imong kasing-kasing karon. Dili kinahanglan nga anaa ka sa relihiyoso nga dapit, dili kinahanglan nga maayo ka nga mamumulong o kaha maalamon nga pagkasulti. Ang pinakaimportante nga ikaw magpaduol diha sa Dios ug imong tuohan ng asi Jesus mao ang Dios ug tugutan nimo siya nga imong Dios ug mokontrolar sa imong kinabuhi. Mahimo ka sa pag-ampo niini:

“Amahan nga Dios, nasayod ako nga ako makasasala. Ako nag-too nga si Jesus namatay sa krus ug nabanhaw gikan sa kamatayon aron sa pagluwas kanako gikan sa sala. Ako naghinulsol sa akong mga sala. Sulod sa akong kinabuhi ug pasayloa ako sa akong mga sala. Akong itugyan ang akong kinabuhi diha kanimo. Salamat sa imong gugma kanako. Sa ngalan ni Jesus, Amen.”

4. “Ako magpabilin diha kaninyo, bisan hangtod sa kapanahonan.”

“Sa balay sa akong Amahan adunay daghang mga lawak; ug moadto ako aron pag-andam ug dapit alang kaninyo. Kon dili pa kini tinuod, dili ko unta kamo sultihan niini. Ug kon atua na ako didto ug makandam na ug dapit alang kaninyo, mobalik ako ug kuhaon ko kamo aron bisag asa ako, atoa usab kamo.”

Si Jesus nagasaad kanato nga ang matag-usa nga magtugyan sa iyang kinabuhi diha kaniya siya makig-uban kaniya sa iyang puloy-anan nga mao ang langit. Ang langit mao ang puloy-anan sa Dios Amahan. Sa diha nga gidawat nato si Jesus sa atong kinabuhi, magpuyo kita sa eternidad kauban ni Jesus. Kini nagpasabot nga si Jesus kauban nato dinhi niining kalibotana, apan sa diha ng akita mamatay makig-uban kita sa eternidad kauban ni Jesus didto sa langit.

Ang gugma ni Jesus kanato, matuod ug molungtad sa walay pagkatapos!